



Sesida dals

Communitgà ils

Protocol nr.

21 d'avrigl 2020

23 d'avrigl 2020

326

## Dumonda Ruckstuhl

concernent las quotas dal UFAS

### Resposta da la Regenza

Dapi che la nova concepziun da la gulivaziun da finanzas e da la repartiziun da las incumbensas tranter la Confederaziun ed ils chantuns è entrada en vigur l'onn 2008, è cumpetenta unicamain la Confederaziun per la surveglianza professiunala, administrativa e finanziaza dals uffizis da la AI. Correspudentamain è la surveglianza vegnida reglada da nov en il rom da la 5. revisiun da l'assicuranza d'invaliditad. Il focus na vegn ussa betg pli mess sin ina controlla realisada en moda suverana, ma bain sin ina gestiun orientada als resultats. En il rom da la nova orientaziun ad ina surveglianza constructiva che sa basa sin il dialog, è vegnì stgaffì tranter auter l'instrument da la cunvegna da finamiras (art. 52 da l'Ordinaziun davart l'assicuranza d'invaliditad [OAI; CS 831.201] en cumbinaziun cun l'art. 64 al. 1 e cun l'art. 64a da la Lescha federala davart l'assicuranza d'invaliditad [LAI; CS 831.20]). Cun agid da cunvegna tranter l'Uffizi federal d'assicuranzas socialas (UFAS) ed ils uffizis chantunals da la AI duai vegnir garantì che las incumbensas dals uffizis da la AI vegnian realisadas en moda efficazia ed unitara sco er en in'auta qualitat (art. 57 ed art. 59 al. 2 LAI). Ademplind l'incumbensa legala fa il UFAS – en in ciclus annual – cun mintga uffizi da la AI ina cunvegna da finamiras. La cunvegna cuntegna d'ina vart finamiras generalas a maun d'indicaturs d'effects. Questas finamiras valan da medema maniera per tut ils uffizis da la AI. Da l'autra vart ston vegnir fixadas finamiras specificas en il dialog tranter il UFAS e mintga uffizi da la AI. Quellas sa basan per regla sin ils resultats dals audits dal UFAS che han lieu avant ils discurs per la fixaziun da las finamiras. Eventualmain pon ellas esser identicas cun las recumandaziuns dals rapports dals audits.

*Tar la dumonda 1:* Per l'onn 2020 èsi vegnì desistì da fixar finamiras quantitativas tranter il UFAS ed ils uffizis chantunals da la AI. Empè da quai è la cunvegna da finamiras 2020 vegnida reducida a las recumandaziuns qualitativas da l'audit dal UFAS dal november 2019. Actualmain n'existan pia naginas cunvegna da finamiras quantitativas pli davart la quota da rentas novas e davart la quota da rentas existentas tranter ils UFAS e l'Uffizi da la AI dal Grischun. Fin l'onn 2019 èn vegnidas fixadas tranter il UFAS e l'Uffizi da la AI dal Grischun – sco en tut ils chantuns – valurs da finamira per ils indicaturs d'effects. Questas valurs da finamira n'èn dentant betg

vegnidas interpretadas sco finamiras da prestaziun liantas, mabain sco valurs d'orientaziun e da planisaziun.

*Tar la dumonda 2:* Ils indicaturs d'effects vegnan eruids dal UFAS e mess a disposiziun mintga quartal als uffizis da la AI. Là èn visiblas er las valurs dals auters chantuns. Las cifras na servan betg en emprima lingia a la controlla, mabain èn plitgusch ina basa per il barat professional cun il UFAS, nua che las valurs vegnan messas en in context pli vast. Quest tractament qualitativ ha lieu d'ina vart en il rom dal discurs per la fixaziun da las finamiras, da l'autra vart a chaschun dals discurs d'audit durant ils audits annuals dal UFAS.

*Tar la dumonda 3:* Dapi l'onn 2019 survegn la cumissiun administrativa da l'Institut d'assicuranza sociala (IAS) dal Grischun mintgamai il management summary dal rapport da l'audit dal UFAS. En quel vegn commentà il stadi actual dals indicaturs d'effects. Ils indicaturs d'effects èn agids d'orientaziun e da planisaziun per la gestiun operativa da l'Uffizi da la AI. Da princip n'han els nagina impurtanza strategica. Perquai vegn la direcziun da la IAS dal Grischun infurmada regularmain tras il manader da l'Uffizi da la AI mo davart il svilup da quests indicaturs.

*Tar las dumondas 4, 5 e 7:* La direcziun da l'Uffizi da la AI s'occupa regularmain cun il svilup dals indicaturs d'effects. A las collavuraturas ed als collavuratur na vegnan questas cifras betg communitgadas activamain, perquai che quests indicaturs n'èn betg relevants per lur incumbensa, numnadamain per sclerir e per disponer prestaziuns cun resultats averts, ch'èn neutralas e confurmas a las pretensiuns. Pervia da quai n'existan nagins conflicts d'interess tranter ils indicaturs d'effects e l'incumbensa legala. Ils indicaturs d'effects han ina funcziun da monitoring per la gestiun operativa da l'Uffizi da la AI. Els servan sco valurs d'orientaziun e pon esser utils sco basa da datas per far in'analisa ed ina reflexiun professiunala sco er per planisar las resursas.

*Tar la dumonda 6:* Il UFAS è obligà tras lescha da far cun mintga uffizi chantunal da la AI ina cunvegna da finamiras. En la cunvegna ston vegnir fixads en spezial l'effect e la qualidad che duain vegnir cuntanschids sco er la rapportaziun (art. 52 al. 1 OAI). Actualmain desista il UFAS da fixar finamiras da prestaziun en la furma veglia (guardar dumonda 1). La cunvegna da finamiras tenor la furma veglia vegn actualmain revedida.



En num da la Regenza

Il president:

Dr. Chr. Rathgeb

Il chancelier:

Daniel Spadin